

4. maj

**Kalaallit nunaanni inatsisartunut qinersisarneq pillugu inatsisartut inatsisaata allangortinneqrnissaa pillugu naalakkerusisut UPA/2017-imut suliniuteqaqqullugit inatsisartut aalajangiiffissaattut siunnersuut, taamaaliornikkut inatsisartunut qinersinissaq tulleq nallertinnagu avanersuup, ittoqqortoormiillu immikkut inatsisartunut qinersivingornissaat qulakkeersinnaaqqullugu.**

(Inatsisartunut ilaasortaq Anthon Frederiksen, Partii Naleraq)

Siumumiit imatut oqaaseqarfigissavarput.

Nunatsini Qinersisarnermi Inatsit ullumikkut atuuttoq malillugu qinersivik ataasiuvoq, tamannalu inuit tamat oqartussaaqataanerannut naleqquttuuvoq.

Nuna tamaat isigalugu sullisinermi ilaatigut nunap immikkoortuini ullumikkut kommuunit pingartumik sanaartornikkut pilersaarutit aningaasalersuinermi tunngavigalugit pilersaarusiortulugu ingerlatsisussaanertik malillugu ullumikkut ingerlapput.

Siunnersuutigineqartumi isorliunerusuni Qaanaaq aamma Ittoqqortoormiit immikkut qinersivingornissaat siunnersuutigineqarpoq, tunngavilersuutigineqartuni ilaatigut immikkuullarisumik inissisimasutut atugassaqartitaanerat oqariartuuteqarsinnaajunnaarnerallu saqqummiunneqarluni. Siumup pingaartippaa nuna tamaat isigalugu qinersisarnermi inatsisip nalilersorluarneqarnissaa, Siumut isumaqarpoq nunaqarfinnut aqutsisunut kommunalbestyrelsenullu qinersisarneq pillugu inatsisit nalilersuinermi ilanngunneqassasut. Tassani tunngavilersuutigaagut, tamat oqartussaaqataanerat aallaavigalugu ullumikkut qinersisarnermi inatsit naleqqunnersoq nalilersorneqartariaqartoq, tamakkiinerusumik isiginnilluni nalilersuinissaq aqqarsatigalugu.

Siunnersuummut tunngavilersuutaasumi ilaatigut oqaatigineqarpoq inuussutissarsiutitigut pimoorullugu siuarsaasoqassappat, aalajangiisartut akornanniitartiaqartut. Ullumikkut naluneqanngilaq kommunalbestyrelsit aqqutigalugit ineriartortitsiniarnerit pilersaarusiorneqartarmata. Ajornanngippat kommuunit ineriartortitsiniarnerminni inuussutissarsiutitigut pilersaarusiornikkullu qitiunerat najukkami qinigaatitaqarnerat atorluagassaavoq.

Inatsisartuni nunatta ataasiusumik qinersiviunera qinersisarnermi inatsit atuuttoq tamakkiinerusumik nalilersorlugu suliarineqassasoq Siumumi piumanaruarput, immikkuullarissumik Ittoqqortoormiit Qaanaallu qinersiviunissaat kisiat nalilersuutiginaagu ullumikkulli qinersiarnermi inatsit tamaat ataatsimut nalilersorlugu.

Nunatsinni aamma Politikkikkut suliniaqatigiiffiit isummanik anguniakkanillu eqiteruffiusut tunngaviusumik assigiinngisitaanngitsumillu anguniagaqarnissamut isummanik equteruffeqarluni atuunnerat illersugassaavoq.

Naluneqanngilaq nunap immikkoortuini ullumikkut qinersiarnermi qinigassanngortittut ilaat inuttut taaguunneqarnerugaluartut inatsit atuuttoq malillugu Partiinut taasinerit katinneranni isinngitsoortoqarsinnaasartoq, naak ataasiakkaatut qaffasissumik taaguunneqaraluartut. Aamma illuatungaanik taasinermi qinersisit appasikkaluartut inuilli ataasiakkaat taaguunneqarujussuarnerini partiimullu qinersisit katinneranni periarfissaqalertarmata isernissaminnut, taamaatumik naliler-sugassat qinersisarnermi inatsimmik ataatsimut isiginnilluni annertupput.

Assersuutigalugu inuit qinersinermi taaguunneqarneri malillugit qinersisoqartartuuppat aamma tamatuma qinikkanut agguataarnera allarujusuussagalarpoq. Aamma allatut eqqarsaraanni nunap immikkortuini qinersisarneq oqallisigineqartunut ilaasariaqartoq Siumumi isumaqarpugut.

Aalajangiiffigisassatut siunnersuut Siumumi isumaqarpugut tamakkiisumik nalilersuinermik tungaveqassasoq, taamaatumillu Qaanaap Ittoqqortoormiullu immikkut qinersivingornissaanut siunnersuut taamatut isikkoqartillugu itigartipparput.

Jens Immanuelson

Siumut